

“Vari tl plurilinguism”

Invit ala presentaziun dla mapa dles unitès didatiches plurilinguistiches por la scolina, en vëndres ai 14 de jügn dales 14.00 tl salf dl Istitut Micurà de Rü a San Martin de Tor

Scolina - Dal ann de scolina 2005/06 incà laora les scolines dla Val Badia y de Gherdëna cun suzès pro le proiet “Vari tl plurilinguism” che ti porta pomez ai mituns y ales mitans dlungia le lingaz ladin inçe le lingaz talian y todësch aladò dl prinzip dla didatica linguistica integrada. Cun n ordinn linguistich de trëi corusc ti vëgnel portè pomez ai pici te na maniera plajora y en forma de jüch les competënzes de basa di 2 lingac manco conesciüs. Les inrescides neurolinguistiches confermëia che le ciorvel laora te na maniera integrala se anuzan pro

vigne lingaz dles competënzes linguistiches che é bele danman. La mapa cun unitès didatiches laorada fora da maestres dla scolina cun la suravijiun scientifica dl prof. Rico Cathomas pita stromënc didatics atuai y d’ütl por podëi laurè plü sauri cun chësta metodologia cun i pici. Les tematiches dles 30 unitès didatiches reverda la natöra, i tiers, le savëi sön le corp, le mangé, i corusc y stories desvalies adatades al’eté dla scolina. La mapa é gnüda dada fora dal Ćiamp inovaziun y consulënza tl Dipartimënt educaziun y cultura ladina.